



جياتن كذاكىمن شرعية هليسيا
JABATAN KEHAKIMAN SYARIAH MALAYSIA (JKSM)

**Y.A.A. Ketua-Ketua Hakim Syarie,
Jabatan Kehakiman Syariah / Mahkamah Syariah,
Negeri-Negeri Seluruh Malaysia**

**SURAT PEKELILING KETUA PENGARAH / KETUA HAKIM SYARIE
JABATAN KEHAKIMAN SYARIAH MALAYSIA
BILANGAN 1 TAHUN 2004**

**PENJELASAN PELAKSANAAN
ARAHAN AMALAN MAHKAMAH SYARIAH NO 11 TAHUN 2002
- KEUTAMAAN KES -**

TUJUAN

1. Surat Pekeliling ini bertujuan untuk memaklum dan menjelaskan mengenai kepentingan pelaksanaan Arahan Amalan No. 11 Tahun 2002 dalam perkara Keutamaan Kes yang telah diterima pakai melalui keputusan Mesyuarat Arahan Amalan Mahkamah Syariah Bil. 3 Tahun 2002 pada 7 Mei, di Johor Bharu, Johor.

LATAR BELAKANG

2. Dalam Akta / Enakmen / Ordinan Undang-undang Keluarga Islam Negeri, perkahwinan melalui kebenaran bertulis Mahkamah diperuntukkan di dalam beberapa peruntukan seksyen yang meliputi perkahwinan di bawah umur pada seksyen 8, perkahwinan wali hakim (*wali nasab terputus, wali ghaib, muallaf dan wali enggan*) di dalam seksyen 13 serta perkahwinan janda berhias dalam seksyen 14 undang-undang berkenaan .

3. Rungutan diterima daripada segenap lapisan masyarakat umat Islam sehingga menjadi perhatian para pemimpin negara dan mereka menggesa supaya Mahkamah Syariah menyegerakan proses perbicaraan dan keputusan berkenaan kes yang didakwa sebagai lewat dan memakan masa yang lama untuk diselesaikan. Sekalipun terdapat ruang keperluan yang boleh disegerakan prosiding kes berkenaan pada hari pendaftaran seperti kes permohonan seorang muallaf, terputus wali dan nikah di bawah umur.

4. Arahan Amalan Mahkamah Syariah No. 11 Tahun 2002 di bawah tajuk perkara Keutamaan Kes telah dikeluarkan oleh Jabatan Kehakiman Syariah Malaysia pada 23 Ogos, 2002 supaya Mahkamah Syariah Negeri memberi keutamaan terhadap kes-kes yang tersebut di atas. Tindakan yang sewajarnya telah diambil oleh kebanyakan Mahkamah Syariah Negeri dalam pemakaian Arahan Amalan No. 11 Tahun 2002 tersebut namun begitu masih terdapat rungutan daripada orang awam terhadap proses pendaftaran dan penetapan tarikh sebutan kes.

KAEDAH PELAKSANAAN KEUTAMAAN KES

5. Berpandukan kepada Arahan Amalan Mahkamah Syariah No. 11 Tahun 2002, adalah disyorkan supaya Y.A.A. Ketua-ketua Hakim Syarie Negeri melaksanakan tindakan pemantauan terhadap pelaksanaan Arahan Amalan tersebut secara berterusan di samping pelaksanaan lain-lain Arahan Amalan yang telah diterima pakai secara rasmi sebagai kepastian terhadap keberkesanan pengurusan kes di Mahkamah Syariah seluruh negeri.

6. Penyelesaian kes yang perlu diberikan keutamaan segera sepertimana dinyatakan di para 2 sebaiknya diselesaikan pada hari pendaftaran atau pada hari bekerja berikutnya dengan syarat semua prosedur dan peraturan telah dipatuhi oleh semua pihak yang berkaitan.

7. Contoh kes permohonan Wali Hakim oleh seorang pemohon yang baru memeluk agama Islam (Muallaf), dokumen yang diperlukan bagi pendaftaran kes adalah seperti berikut :-

- i. Notis Permohonan dan Affidavit ;
- ii. Sijl Memeluk Islam yang asal atau salinan yang diakui sah ;
- iii. Pengesahan daripada Pendaftar Nikah, Cerai dan Rujuk yang berkenaan yang mengesahkan Pemohon tiada mempunyai Wali Nasab ;

Sekiranya segala dokumen telah lengkap dan disempurnakan pendaftarannya pada hari itu, ia hendaklah dibicarakan dan diberikan kelulusan kebenaran pada hari itu juga.

TARIKH KUATKUASA

8. Surat pekeliling ini berkuat kuasa mulai dari tarikh ia dikeluarkan.

PENUTUP

9. Y.A.A. Ketua-ketua Hakim Syarie Negeri adalah dinasihatkan untuk menghubungi Jabatan Kehakiman Syariah Malaysia sekiranya terdapat sebarang pertanyaan mengenai pelaksanaan surat Pekeliling ini.

“BERKHIDMAT UNTUK NEGARA”

“SYARIAH ASAS Keadilan”

(DATUK SHEIKH GHAZALI BIN HAJI AB. RAHMAN)

Ketua Pengarah / Ketua Hakim Syarie,
Jabatan Kehakiman Syariah Malaysia

1 MAC 2004